

Pita Uqa Jaqec Je Lecisdoc

Anutna Dana Cajaca Jaqiaden

Aqunec Je

Jaqec je i uqana gug eu Kristen cunug age uhulec iwaladec dana leih agena je dah mimeig agena wal kobil majanagaca qee eu toodoo odowainnu agena je cain dah mowain (eu 2.1-2). Kristen age mele je aposel adein eu hewi daugdoqagan. Age kobil euna Anutca, Jisas Krais Tibudca du cuhadoqagan. Aposel age amagana Jisas fein, odocobil Jisas iwaladeceb doin.

Jaqec je ina je ben osoha nijia. Dana leih age Jisas uqa qee ceseli hoiaun ec madein (eu 3.3-4). Euqa jaqec je i Jisas uqa ceseli hugian ec madena. Mele, uqa mahuc qee ceseli hoiaun, euqa uqana gug eu odi. Anut uqa dana oso fadaleiaunnu gale dona. Uqa dana cajaca cunug age agena silailnu tului falicdoqagannu gale dona. Eunu uqa camuhulaadi saen cecelac age silailnu tului falidocnu sumadena (eu 3.9).

Je Dunuhnu Dado Mec

1. Aqunec je (1.1-2)
2. Age Kristen dana cajaca ben caleigale (1.3-11)
 - A. Anutna gagadic odoc eu Anutna kobilna cobocnu cesulgena (1.3-4)
 - B. Age agena wawaga meleec eu Anutna kobil me cunug tubdoigale (1.5-7)
 - C. Age Anutna kobil eu cunug ocobilfi agena Anutnu cabi eu aig mati bahic qugian (1.8-11)
3. Pita uqa eetanu jaqiadene eunu sildiadene (1.12-21)
 - A. Pita uqa agena cisdoc fogo duadigiannu me je haun maadene (1.12-15)
 - B. Pita uqadodoc ameggul Jisas Krais uqana gagadic odoc fulacdocca fen (1.16-21)
4. Pita uqa uhulec iwaladec dananu ulauladene (dac 2)
 - A. Uhulec iwaladec dana age Kristen gemona caloqagan (2.1-3a)
 - B. Anut uqa uhulec iwaladec dana eu gesiladigian (2.3b-9)
 - C. Pita uqa uhulec iwaladec dana age dumanaganu madena (2.10-22)
5. Jisas Krais uqana ceseli hoc (3.1-16)
 - A. Pita uqa eetanu jaqiadene ec haun madena (3.1-2)

- B. Deel cit qocna dana leih age lelanec je madegina eundec caloqagan
(3.1-2)
- C. Jisas Krais uqa ceseli hugian eu mele bahic (3.8-10)
- D. Krais ceseli hugian eunu age gun kobolna cobimeig Anutna kobol
cunug toodu odoigale (3.11-16)
6. Cit qoc je (3.17-18)
-

1 ¹Ija Saimon Pita, ija Jisas Kraisna cabi dana aposelca. Ija dana cajaca age Jisas Kraisnu wawaga meleena eu jaqidigina. Jisas Krais uqa eguna Anut, uqa eguna Cahahagec. Jisas Krais uqa ititom. Age uqanu wawaga meleec wele oin. Eunu agena wawaga meleecca eguna wawige meleecca eu ihocihoc. ²Age Anut Jisas eguna Tibudca eunu dogina. Age alenu dudu cuhadodogin ale eelgec uum igec malol bilecca haunhaun adesiale.

Ege Anutna dana cajaca bilecnu nesili cedigen

³Jisas Krais uqa Anut, uqa gagadic odocca. Uqa culgeceb uqanu du cuhadom. Uqa binanca bahic, uqa gagadic meca bahic euna ege uqana bilitoqannu utagen. Odocob uqana gagadic odoc eu cesulgeceb uqa ceteteh cunug eu eguna cebac biley gagadic mecnua, ege Anutna kobolna cobocnuca ihoc igen. ⁴Jic euna uqa ceteh ben bahic, me bahicca igigian ec je hahun maden eu igen. Euqa Krais uqa ceteh me bahic i igen, odocob uqa euna cesulgeceb wawige cajecnu kobol eu ege dana cajaca mahana biluquna me qee migina eu felacudigeceb busalom. Odocob ege Anutna cebac bilecca, uqa dumanca om.

⁵Gug inu dih age odi odoiga. Age wawaga meleena. Odocob age tutuc cobocnu cabi gagadic bahic umeig agena wawaga meleec tubdoiga. Odocob age Anutna cisdoc silec ocnu cabi gagadic bahic oiga. Anutna cisdoc silec eu age adi cobocnu dado madigian. Odocob Anutna cisdoc silec eu agena tutuc coboc tubdoiga. ⁶Odocob age dumanaga me cofdocnu cabi gagadic bahic umeig eu Anutna cisdoc silec tubdoiga. Odocob age wawaga duuecca tawecnu cabi gagadic bahic oiga. Wawaga duuecca tawec eu culumen dain adec sogoecca gahidocnu cesuladigian. Odocob age wawaga duuecca tawec eu dumanaga me cofdoc tubdoiga. Odocob age Anutna kobolna cobocnu cabi gagadic bahic umeig eu age wawaga duuecca tawec tubdoiga. ⁷Odocob age wawaga meleec cotogailnu wawaga qocnu cabi gagadic bahic umeig Anutna kobolna coboc tubdoiga. Odocob age wawaga meleec cotogailnu nalunuga mecnua cabi gagadic bahic umeig wawaga qoc tubdoiga.

⁸Age Jisas Krais eguna Tibudnu wele doin. Age kobol eundec cunug ocobilfi eu ageca gagadic calecebfu agena Jisas Kraisnu doc eu gauc bilecnu ihoc qee. Eu aig mati bahic qugian. ⁹Ge, dana uqa kobol

eundecca qee, uqa ceteh onoca bilia fecnu ihoc qee, uqa dana ameg galuc mec cinigwe. Uqa Anut uqa uqana silail uqa wele moloi eu cagasiteceb cataniec biligen ec dahig celen. ¹⁰Ija wawige meleec cotiel, Anut uqa age nesili cedadimei age uqana dana cajaca bilecnu utaaden. Eunu age agena cobocna age Anutna dana cajaca ihacecnu kobil eundec cunug cabi gagadic oiga. Ge, age odi odifeig agena wawaga meleec toni qocnu ihoc qee. ¹¹Eunu age odi odocobilfi Jisas Krais, egena Tibud, egena Cahahagec uqa geh bahic cesuladeceb age uqana cul dunuh loqagan. Cul euna Jisas Krais uqa king bileceb catanena.

¹²Eu mele, age ceteh i cunug wele doin. Age mele je i wele oin, odocob age euna gagadic taweginia. Euqa age kobil eundecnu dahiniga celecdainnu ija kobil eundecnu agena cisdock gaid fogo duadigen. ¹³⁻¹⁴Ija dugina, nag odi ija deweni i culigen. Egena Tibud Jisas Krais ceteh inu je hahun maten. Eunu saen cunugna ija deweni ina biligina ija agena cisdock fogo duadigennu haun maadigen eu me bahic ec cisdegina. ¹⁵Eunu ija ceteh inu maadecnu cabi gagadic ugina. Odocob hibna saen ija wele cal mecemin age je i saen cunugna ceteh inu haun ihoc cisoqagan.

Ege aposel Krais uqana gagadic odoc fulacdocca fom

¹⁶Ege wele egena Tibud Jisas Krais uqa gagadic odoc, odocob uqa ceseli hugian ec maadocomun doin. Euqa ege Jisas Kraisnu je eu maadocomun doin saen euna ege dodo gauc dana agena cisdocknadeec toodu qee maadolom. Egedodoc amigegul Jisas Krais uqana gagadic odoc fulacdocca fom.^a ¹⁷Ege uqaca aluh gunna ono tatavoqon saen Anut Memige uqa binan suldumei gagadic odoc fulacdocca uten. Odimei uqa gagadic odoc fulacdocca uutei Anut uqa king binan meca bahic uqa sao jobonded maden:

“Eu ija melami,
ijia uqanu nalug migina,
ijia uqanu wawi me nijia,” en.

(Matju 17.5; Mak 9.7; Luk 9.35)

¹⁸Ege Anut jejeg eu sao jobonded cacalen dah mom. Ge, saen euna ege uqaca aluh gunna tatawai dom. ¹⁹Odocob ege je hahun madec dana wele bilein agena jenu gagadic bahic wawige meleecnu ihoc. Agena je eu adi Jisas Kraisnu wawaga meleecnuca, adi cobocnuca cesuladene. Agena je eu gowoc cudun tuna gogowi bilina cinigwe. Eu gogowi bibilen li walag dadaneb malaqa boei^b age wawaga dunuh wasigian. Eunu ageha agena je gagadicca hewifeig eu me bahic.

²⁰⁻²¹Euqa age ceteh matu inu casac docnu doiga. Je hahun madec dana oso uqa dana agena gale adecna je hahun qee madel. Euqa Kis Gun uqa

^a (1.16) Je i Jisas deweg ibuldon eunu madena. Matju 17.1-13; Mak 9.2-13; Luk 9.28-36 eu feiga. ^b (1.19) Malaqa boei eu Jisas Krais. Jahunec Camasac Muden Je 22.16 eu feiga.

dana tuliadeceb age je Anut aden eu madein. Je hahun madec dana agena je eu Anutna jaqec je nijia. Euqa ege dana eguna cisdock himec toodumeb je eu uqana gug sildiadecnu ihoc qee.

Uhulec iwaladec dana

(Jud 4-13)

2 ¹Eu mele, uhulec je hahun madec dana leih wele Isrel dana cajaca gemona calein. Eu odiwe uhulec iwaladec dana ageha gemona caloqagan. Age jahunimeig uhulec iwaladec je filfil ahoqagan. Uhulec iwaladec je eu Anutna je qee toodoiaun. Dana age uhulec iwaladec je toodoqagaqa eu age fadalooqagan. Odocob uhulec iwaladec dana age Tibud uqa ceseli fajaden eu qee sasac qoqagan. Eunu Anut uqa mahuc bahic fadaladeceb qee moqagan. ²Odocob dana mati age agena wal kobil majanagaca qee toodu odoqagan. Eunu age eu odi odocobil dana cajaca age mele cobocnu jic eunu je me qee madoqagan. ³Odocob dana eu age ban falec dana bahic eunu age uhulec je mati agena qaig ceteteh diduadoqagannu madoqagan. Euqa wele bahic Anut dana eundec gesiladijannu deel saciadon bilia. Odocob uqa fadaladigian. Aria, agena fadaladec qee us nijina. Tu gegeldon sumadi bilina.

⁴Age dogina, wele ensel leih age silail mein. Odocob Anut uqa ensel eundec qee culadel qa qeladeceb oloqanihna lein. Ono age mama helo tuca onoca bahic Anut saciaduaden euna gihacaden bilegina. Euna age Gesiladec Deel Bennu sumudi bilegina. ⁵Odocob ageha dogina, wele dana cajaca age wa sil ben saona qee nec mahana bilein eu age Anutna kobilna qee coboin. Anut uqa dana cajaca eundec qee culadel qa uqa odocob wa sil ben nimei dana cajaca eundec fadaladen. Euqa Noa uqa ititom kobilna je maaden. Odocob Anut uqa Noaca dana cajaca 7-pelaca cofadeceb me billein. ⁶Odocob ageha dogina, Anut uqa madeceb Sodom Gomoraca jobon fadalesin. Uqa jana cijaleceb comis himec qahesin. Uqa hahun ihacadec biligiannu odi odon. Odocob dana cajaca age hibna caloqagan eu age Sodom Gomoraca ale Anutna kobilna qee cobocibil uqa odi fadalalen ec cidoqagan. Odocob dana cajaca ageha Anutna kobilna qee cobocibilfi Anut uqa age fadaladigian eu odi uqa Sodom Gomoraca fadalalenwe ec cidoqagan. ⁷Odocob ageha dogina, Lot uqa dana ititom uqa Sodom bilen. Uqa Sodom silail dana agena wal kobil majanagaca qee eu fimei uqa waug culumen ben don. Odocob Anut uqa Lot qee fadadol qa uqa cahahadon. ⁸Ge, dana waug ititom eu uqa Sodom dana gemona bibilei deel cunugna uqa agena silail kobil fifi dudu. Odocob age Anutna loo je tefacdoein eunu uqa waug geh dain don. ⁹Aria, ceteteh i cunug Tibud odon ec dogina. Eunu age dogina, dana cajaca age Anutna kobilna cobogina eundec temadec ageca calecebfii Tibud uqa temadec eunadec cahahaadecnu dona. Odocob Tibud uqa silail dana

agen a me qee odoc wele don. Odime i uqa agena ameg me qee wadacade ccofdudu li agena gesiladecnu deel gadacna caligiannu dona.¹⁰ Dana eundec leih age ameg me qee bahic oqagan. Eu age golanaga me qeenu silileceb kobil gegehinca odogina. Odimeig age Tibud uqa agena ilo biligiannu qee gale adena.

Age deboecca, age ija didih ii cobogina. Eunu age ensel fulacdoc gagadic odocca sao jobon bilegina eu agenu je me qee madecnu qee cucuiegina.¹¹ Ensel eu age gagadic odocca bahic age ensel leih silail mein eu wooladegina. Euqa ensel eu age ensel silail mein qee cewadegina, odimeig age Tibud amegna agenu je me qee gesiladi madegina.

¹² Euqa dana eu age dool cus cinigwe. Dool cus age qee cisdogina qa age dewenega gale adec himec toodoo odogina. Dool cus eu dana age cedadimeig qagaadoqagannu himec anagail basadein. Eu odiwe uhulec iwaladec dana eu age qee cisdogina. Age ceteh agena gugnu qee dogina eunu je me qee mamadi qesaldogina. Eunu age dool cuswe fadaloqagan.¹³ Age kobil me qee odooin. Eunu age agena ameg umeig sogooqagan. Age cahineg sab wainca gehca jegina eu kobil me bahic ec cisdogina. Age kobil gegehinca wal kobilca oodogin age age gami sab jegina. Eunu age Anutna dana cajaca odadecbil age gegehinca megina. Eu age age majanaga hewadegina. Euqa silail dana eundec age uhulec kobil odogina eunu ceelegina.¹⁴ Age gaid caja feciadimeig amaga qocob wal kobil eu me ec cisdogina. Age amaga eu silail kobil nenehdogina eu culecwe qee. Age dana wawaga meleec gagadicca qee eundec faninadimeig silail moqagannu diadegina. Age culunuga eu wele ban falecnu kobil iwaldoin. Tibud uqa dana eundec geladigan!¹⁵ Age jic tutuc culimeig jic ceja qoin. Age jic Belam on eu toodoin. Belam, uqa Bio melah, uqa me qee odocna meen qaig ugiannu gawen.¹⁶ Odocob Tibud uqa uqana silailnu galac muden. Tibud uqa odocob uqana cesel eu jejegca qee qa dana jejegca mimei je madon. Odimei Tibud uqa je hahun madec dana eu gad kobil odocnu cahacdon.

¹⁷ Uhulec iwaladec dana eu age wa mahana hunecebile galalena cinigwe. Age hut fufu ben hu fudocob nuina cinigwe. Eunu Anut uqa agena cudun eu heel tu kaudoc bahic saciaduaden njia.¹⁸ Ge, dana eu age deboi gad je caunca qee madegina. Age mamadeig dana leih faninadecbil golanaga cajeceb age wal kobil majanagaca qee filfil odocnu odadegina. Odimeig age kobil euna dana age qila bahic haide agena jic ceja qoc culegina eu diadecnu cabi ocobil age uhulec iwaladec dana beli tooadegina.¹⁹ Ceteh oso dana wooldocobfi dana eu ceteh eu uqana cabi dana bilina. Eunu uhulec iwaladec dana eu age maadegina, "Age Anutna loo je toodocnu qee nijel. Age agena gale adec toodocnu ihoc," adegina. Euqa age odi mamadeig agedodoc age fadalecnu kobilna cabi dana bilegina.²⁰ Ge, dana age egena Tibud, egena Cahahagec Jisas Kraisnu dumeig

age mahanadec wal kobol cuculdi busalein eu age kobol me qee haun fagadecel wooladecebf agena bielec haun eu me qee bahic migian. Agena bielec haun eu age wele hahawan bielein eu wooldona. ²¹ Ge, qila age Anut ititom mudecnu jic inu dogina qa age Anutna loo je gun Anutna sos age dana maadecebilo in eu age hibemdooin. Eunu age adi Anut uqa dana ititom mudina ec doin qa age qee docwe moubmi eu me bahic nijoub.

²² Ceteh ageca calen eu odi dado madec je oso odi madena:

“Qa uqa fojime haun ceseli li uqana fojoc jena,” ena.

(Sindaun 26.11)

Odocob dado madec je osoha eu odi madena, “Age ho wa joudecebilo uqa nui haun oligna wahol nona,” ena.

Tibud uqa hugian eu mele bahic

3 ¹O ijana danah bahic, jaqec je i eu jaqec lecisdock qila ija age jaqidigina. Jaqec je lecis ina ija age je inu haun cisdoqagannu agena cisdock tuliduadigina. ²Ija je inu haun maadiginana age Anutna je hahun madec dana age wele ceteh hibna caligiannu dana cajaca maaden eunu haun cisdoqagannu maadigina. Odocob age Tibud eguna Cahahagec uqana loo je magen eunuha cisdoqagannu maadigina. Tibud uqa uqana aposel suladecel ageca limeig aposel conogana Tibudna loo je eu dah mein.

³Casac age ceteh ben osonu du cuhadoiga, eu odi. Deel cit qocna dana leih age lelanec je madegina eundec caloqagan. Odimeig age wawagana gale adec me qee eu toodoqagan. Age udoc je odi ⁴madoqagan, “Uqa ceseli hugen ec madenfo? Uqa ai? Uqa qee ceseli hoiaun. Ge, ege jajanigeil age wele cal meinadec leceb qila ceteteh cunug eu gaid odi dih nijina eu odiwe maha i ifanen saennadec leceb qila ceteteh cunug eu gaid nijinal!” oqagan. ⁵Age ceteh nijianu cisdumeig doiga ec qee adel. Ceteh eu odi. Wele bahic Anut je madeceb sao calen. Odimei uqa wa umei maha mudeceb wa gemona calen. ⁶Odocob hibna Anut je haun madeceb wa sil ben caleceb maha eu cunug wa jebudon. Odocob maha hilah eu fadalen. ⁷Euqa qila Anutna je euha taweia, eu odi. Sao mahaca qila bilesina eu jana cijigiannu saciadon nijia ec madena. Sao mahaca ale Anutna Gesiladec Deel Ben caligiannu sumudi bilesina. Deel euna dana cajaca age Anutna kobilna qee cobogina eu gesiladeceb fadaloqagan.

⁸Euqa ijana danah bahic, age ceteh osol inu cain dahiniga celeiaun! Tibud amegna deel osol eu odi cabi gel 1,000we, odocob cabi gel 1,000 eu odi deel osolwe. ⁹Tibud uqa odigiannu je hahun maden eu qee daleena eu odiwe leih age uqa daleena ec cisdogina. Euqa uqa dana oso Cain fadaleiaunnu gale dona qa cunug age silailnu tului falicdoqagannu gale dona. Eunu uqa camuhulaadi saen cecelac age silailnu tului falicdocnu sumadena.

Sao mahaca i ale qee mowasan

¹⁰ Euqa Tibudna deel eu heje danawe hugian. Odocob deel euna sao uqa geh bahic udududuimej jajanu qeligion. Odocob mahaca ceteteh cunug mahana nijadenaca ja cijeceb fadaloqagan. Eu maha cunugca ceteteh cunug Anut maha mudenca camasac bahic caloqagan.^c ¹¹ Aria, cisdoiga. Ceteteh i cunug fadaloqagan. Eunu age dana cajaca adi biloub? Age gun kobolna cobimeig Anutna kobil cunug toodoubda. ¹² Age kobil euna cocobi Anutna deel susumudi bileigale. Odimeig age deel eu mahucwe hugiannu cabi gagadic oigale. Deel eunu saoca ceteteh cunug saona nijadenaca eu ja ben cijadeceb qee moqagan. Odocob ceteteh cunug Anut maha muden eu ja ben cijadeceb wawa mi qojogoecebil qee moqagan. ¹³ Euqa Anut uqa je hahun wele maden. Uqa sao haun maha haunca mudigian ec maden. Maha haun euna kobil ititom himec biligian. Eunu ege Anutna je hahun eu aig qugiannu susumudi biluquna.

Ege meciis cuhadudu Tibud susumudi biluqale

¹⁴ Eunu ijana danah bahic, age ceteteh i caligiannu sumudi bilegina. Eunu age susumudi bibleig age Anut amegna tutuc bahic cahuldocca qee biluqagannu cabi gagadic oigale. Odocob age uqaca osoben wawaga malolca bileigale. Odocob Tibudna deelna Anut uqa agena kobil me bahic figian. ¹⁵ Egena Tibud uqa egena silailnu tului falidocnu sumigina. Age cisdoiga, Tibud uqa ege cahahagecnu kobil eu odi odona. Anut uqa ege cotige bahic Pol cisdoc silecca uten. Odocob uqaha uqana cisdoc silecca toodumei je eundec age jaqiaden. ¹⁶ Uqa uqana jaqec je cunugna ceteteh inu gaid madena. Uqana jaqec jena ceteh leih eu docnu cabi bahic, eu dana docca qee age wawaga gagadicca qee tawegina eu age Polna jaqec je sildi cahuldogina, eu odiwe age Anutna jaqec je leihha sildi cahuldogina. Age odi odoginanu agedodoc fadaloqagannu euca hogina.

¹⁷ Eunu ijana danah bahic, age ceteh hib caligiannu doin. Eunu loo je tefacdoc dana agena uhulec iwaladec je eu diadeceb agena duuec tawec eunadec tonowainnu agedodocnu meciis cuhadoigale. ¹⁸ Euqa Jisas Krais uqa egena Tibud, uqa egena Cahahagec uqa eelgec uum igec eu age aden. Odocob age uqanu du cuhadogina. Eunu age eeladec uum adecca uqanu docca cesuladeceb ben mimeig duuec taweigale. Uqa qilaca saensaen cunugca kobolkobolca bieleceb cataneiale. Mele.

^c (3.10) Grik jaqec je hilah leih age odi madein, “Eu maha cunugca ceteteh cunug Anut maha mudenca cijeceb qee moqagan.”